

明

史

明史卷六十

志三十四

禮十八

凶禮二

皇后陵寢

皇后陵寢洪武十五年八月十日高皇后馬氏崩太  
祖命禮部考皇后喪服之制禮部言宋制在京文武  
官喪服皆官製之閑居聽除官員皆給以布其服用  
麻布直領大袖衫麻布冠裙麻腰經麻鞋于是命在  
京文武百官及聽除官員人給布一疋令其自製服  
皆斬衰二十七日而除服素服百日服淺淡色衣凡  
在京官于第四日清晨素服至右順門外具喪服入

臨畢素服行奉慰禮三日而止武官一品至五品文  
官一品至三品命婦亦于第四日清晨素服至乾清  
宮具喪服入臨行禮禁用金銀珠翠首飾及施脂粉  
喪服用麻布蓋頭麻布衫裙鞋其在外文武官喪服  
之制與京官同聞訃日于公廳成服三日而除命婦  
喪服與京官命婦同亦三日而除軍民男女皆素服  
三日禁屠宰在京四十九日在外三日音樂祭祀皆  
停百日嫁娶文武官停百日軍民停一月冊謚大行  
皇后曰孝慈皇后九月製神主用栗木高六寸九分  
廣二寸九分跌高二寸六分通高九寸五分神宮高

三寸九分濶七分深三分圭匱高一尺一寸二分濶  
四寸八分濶四寸座七層高三寸通高一尺四寸  
二分四面俱黑漆戲金雲鳳文神門高二寸三分濶  
如之狀如意飾以渾金圭龕高八寸四分濶三寸八  
分濶濶三寸四分三面俱黑漆戲金置匱內座上不  
用頂將發引具醴饌告太廟遣官致祭金水橋午門  
等神仍遣官祭鍾山之神告以安葬孝慈皇后于鍾  
山之陽以成穆貴妃永貴妃汪貴妃祔梓宮發引文  
武百官俱喪服詣朝陽門外奉辭九月十三日安厝  
皇帝皇太子奠元纁玉璧行奉辭禮神主還宮文武

百官素服迎于朝陽門外回宮百官行奉慰禮帝復以醴饌祭于几筵殿自再虞至九虞皆如之是晚仍遣官以醴饌告謝鍾山之神以復土故也命所葬山陵曰孝陵十月卒哭以孝慈皇后神主詣廟行祔享禮十一月喪百日帝輟朝以牲醴致祭于几筵殿還宮百官素服黑角帶詣中右門候奉慰東宮親王復以牲醴祭孝陵公侯等從祭妃主亦詣陵祭命婦詣几筵殿祭奠自後凡遇四時節序及忌日東宮親王祭几筵殿及孝陵皆如之仍以祔葬諸妃配享諸王府遣內官致祭者亦于几筵殿前丹墀內隨班行禮

廿六年八月小祥輟朝三日禁在京音樂屠宰設齋  
醮于靈谷寺朝天宮各三日是日帝率皇太子以下  
詣几筵殿祭如常儀百官素服詣宮門進香訖詣後  
右門行奉慰禮外命婦俱詣几筵殿進香皇太子親  
王執布練冠九袂皇孫七袂皆去首經負版辟領褰  
皇妃皇太子妃王妃公主皇孫女執布蓋頭去腰經  
宗室駙馬練冠去首經內尚衣冠將所釋服于几筵  
殿前正南偏東丙位焚之皇太子親王復詣孝陵將  
禮大祥奉安神主于奉先殿預期齋戒告廟百官陪  
祀畢行奉慰禮

成祖皇后徐氏永樂五年七月四日崩禮部奏喪禮如高后時儀自次日爲始輟朝不鳴鐘鼓帝素服御西角門百官素服詣思善門外哭臨畢行奉慰禮明日如之又明日成服哭臨畢素服行奉慰禮自次日爲始各就公署齋宿至二十七日止其文武四品以上命婦成服日爲始詣思善門內哭臨三日聽選辦事等官各喪服人材監生吏典僧道坊廂耆老各素服自成服日始赴應天府舉哀三日又定各王及公王等服制世子郡王皆齊衰杖期世子郡王妃并郡主皆大功周楚諸王及寧國諸公主并郡王之子

皆小功遣中官以<sub>二</sub>大行皇后訃告趙王高燧及永安公主永平公主并召赴京遣人訃告諸王府九月命禮部造大行皇后祔謁太廟祭器及謚冊謚寶悉以檀香爲之十月冊謚大行皇后爲仁孝皇后命淇國公丘福頒冊禮部尚書趙鼎頒寶帝躬告天地于秦天殿丹陛上宮中先設冊寶案于几筵殿設香案于冊寶案前帝御華蓋殿百官于奉天殿前丹墀內分班序列鴻臚等官引頒冊寶官至華蓋殿行禮引禮贊跪傳制官傳制曰永樂五年十月十四日冊謚大行皇后命卿行禮俯伏興四拜序班舉冊寶案出



至奉天殿丹陛上置絳輿中由中道出頒冊寶官隨  
後至右順門外內官舁絳輿由正門入至几筵殿以  
冊寶贊案退俟于殿外尚儀女官詣香案前跪進曰  
皇帝遣太子太師淇國公丘福禮部尚書趙珣冊謹  
大行皇后謹告贊宣冊女官捧冊立宣于几筵之右  
置冊于案贊宣寶女官捧寶立宣于几筵之右置寶  
于案尚儀女官詣香案前跪奏禮畢女官以冊寶案  
置几筵之左內官出報禮畢頒冊寶官復命過百日  
禮部請御正門視朝鳴鐘鼓百官易淺淡色衣帝以  
梓宮未葬仍御西角門不鳴鐘鼓百官仍素服去第

七月喪周髡帝具素服詣几筵致祭百官西角門奉  
慰輟朝三日在京停音樂禁屠宰七日命禮部于天  
禧寺朝天宮設薦揚齋醮其明日帝服吉服御奉天  
門視朝鳴鐘鼓百官朝參服淺淡色衣烏紗帽黑角  
帶退朝署事仍素服遇朔望朝見慶賀公服朝服如  
常儀几筵祭祀熟布練冠七年五月營山陵于昌平  
縣初命禮部擇地得吉于昌平縣東黃土山車駕臨  
視遂封其山爲天壽山是日遣武安侯鄭亨祭告興  
工命武義伯王通董役事十一年正月梓宮發引先  
期齋戒三日遣官以葬期奏告天地宗廟社稷帝具

素服祭告几筵皇太子以下素服隨班行禮遣官祭  
所過橋門及緣途祀典諸神百官并命婦各素服以  
序路祭送梓宮出江東門至江濱百官奉辭皇太子  
漢王送梓宮渡江皇太子哭辭漢王護梓宮行途中  
朝夕哭奠如儀官民迎祭者皆素服二月十六日葬  
于長陵昇梓宮軍士千人人賜鈔米薪復其家護送  
官軍各賜鈔有差

仁宗皇后張氏正統七年十月十八日崩禮部定大  
行太皇太后喪禮皇帝成服三日後即聽政天地宗  
廟社稷百神祀皆勿廢諸王以下內外各官及命婦

喪服通計二十七日而除軍民男女止素服十三日  
諸王勿會葬外官勿進香臣民勿禁音樂嫁娶合葬  
獻陵

宣宗皇后胡氏宣德三年以疾請居別宮正統八年  
十一月五日崩謚靜慈仙師葬西山天順七年閏七  
月加謚恭讓誠順康穆靜慈章皇后修葺陵寢

宣宗皇后孫氏天順六年九月四日崩其儀與正統  
七年昭皇后同但改思善門哭臨爲清寧門合葬景  
陵

英宗皇后錢氏成化四年六月二十六日崩禮部進

夫行慈懿皇太后喪禮如舊儀惟屠宰止禁其外  
國使臣免哭臨詔禮部會羣臣議陵寢大學士彭時  
等言慈懿皇太后作配英宗正位中宮名號彰著已  
數十年今壽終之後宜奉梓宮祔于裕陵奉神主祔  
于太廟此古今不易之禮聞聖命欲別卜葬地臣等  
疑懼竊窺聖意以今皇太后千秋萬年之後當與先  
帝同尊于陵廟自嫌二后並配非本朝之制然有二  
太后自今始則陵廟之制亦當自今日以義行之考  
之前代二帝二后並祔陵廟者未易悉數如漢文帝  
尊其生母薄太后然於其嫡母呂太后雖得罪宗社

尚與父高祖並葬長陵宋仁宗追尊生母李宸妃爲  
太后然于其嫡母劉太后雖本無子尚與父真宗同  
祭太廟皇上于慈懿皇太后昔日致其養今日盡其  
哀若陵廟之斟酌未合禮致詒後議有揜前美况萬  
年之後今皇太后與慈懿皇太后同在陵廟不相妨  
礙且愈足以見二太后生存之日雍和無間永久之  
後華美無窮疏入再命會官定議禮部尚書姚夔及  
在廷文武大臣翰林科道等官集議謂兩宮之名號  
既同二母之體位相等陛下之孝養如一今慈懿皇  
太后之喪與皇太后千秋萬歲後俱合葬裕陵慈懿

皇太后居在今皇太后居右配享英廟禮亦宜然萬  
一合葬祔廟之制不合典禮在廷百辟將有言之矣  
下萬世亦將有言之安保將來終無據禮改而從正  
者乎帝曰卿等所言固是正理但聖母在上事有窒  
礙屢請未允若因此違忤致有他虞豈得為孝今當  
于裕陵左右擇吉地安葬崇奉如禮庶幾兩全少詹  
事柯潛暨祭酒邢讓等疏爭之魏國公徐備合公侯  
駙馬伯都督錦衣衛指揮等亦上疏爭之御史康永  
韶等復爭之禮科魏元等疏稱父母有過子不以泣  
諫是將陷親于不義不得為孝子人君有過臣不以

死諫是將致君子非義不得為忠臣。慈懿皇太后之  
喪，廷臣所議合葬祔廟，名正言順。允合天理，克當人  
心。今欲擇地別葬，謂出聖母之意，當起敬起孝。悅則  
復諫，不可因未得命而遽已。陛下既知羣臣所議為  
正禮，而未能諭諫聖母，以必從恐或陷于有過之地。  
未得為孝親之至，臣等既知其非禮而不能死諫，是  
將置陛下于有過之地。又豈愛君之道哉？禮部尚書  
復合部院大臣上言：我國家立法垂憲，一本乎三綱  
五常之道，而議禮制度尤嚴于君臣父子夫婦之間。  
雖有倫序莫敢踰越。今慈懿皇太后之喪，禮宜合葬。



相廟乃祖宗之成法而先帝之遺意也陛下重以母  
后之命恐拂其意有所從違臣等以為母后之命固  
所當重而祖宗之法尤所當重母后之意固未可違  
而先帝之意尤不可違母后天性聰明敦厚倫理其  
意未必不可回若果不見從則當斷以大義亦在陛  
下處之而已時文武羣臣既上疏復跪伏文華門前  
以待必從而後已帝復懇請于皇太后自己至申稍  
見從遂出數奏同辭批荅云合葬之禮蒙允行矣于  
是羣臣皆呼萬歲而退九月祔葬裕陵

憲宗母后周氏弘治十七年三月朔日崩即日發喪

頒遺詔以日易月二十七日而除是日小殮三日大殮成服禮部請帝遵制于初七日視朝帝以哀痛方切未允再疏懇請乃以八月視朝召大學士劉健李東陽謝遷至煖閣素幄中議陵廟事帝袖出裕陵圖并紙孝莊睿皇后元堂與英廟皇堂違數丈中隔不通乃指示曰此未合禮先帝亦甚不得已耳今宜釐正健等對以誠如聖諭帝謂欽天監言恐動風水朕已面折之今日開擴合葬不為動風水乎惟誠心為之諒亦無害四月奉梓宮安厝裕陵

熹宗治汪氏景泰三年廢天順元年二月復為邸王

純正德元年十一月十五日薨禮部會府部大臣及翰林科道官酌議奉在妃係景皇帝之配與在外王妃不同喪葬之禮宜如皇妃例當從厚况景皇帝陵寢已定亦宜合葬自明日始輟朝三日祭九壇太皇太后皇太后中宮親王公主王妃皇親駙馬文武大臣命婦各有祭制可

憲宗皇后吳氏歲化初廢正德四年正月己酉薨大學士李東陽等言漢成帝廢后許氏葬延陵交道廐西光武廢后郭氏葬北邙山凡皇后廢黜史冊猶稱廢后書有葬地未有降為庶人之禮廢后吳氏原奉

憲宗詔書止云退居別宮開住累朝以來服食供奉  
皆從優厚今日之事宜令禮部斟酌儀節事從簡省  
而殯殮祭葬皆不可缺以存皇上敬老念舊之意帝  
諭禮部喪禮倣英廟惠妃故事太常寺以祭儀請命  
歲時用素盞別祭于墓所

憲宗皇后王氏正德十三年二月四日崩越三日帝  
至自宣府乃發喪文武羣臣具素服于清寧宮門外  
聽宣火行太皇太后遺詔六月梓宮將赴葬山陵遣  
駙馬都尉蔡震護喪賜之勅曰今奉孝貞太皇太后  
葬安厝茂陵爾為國戚禔宜護葬凡山陵道途祭

奠及一應喪事皆以屬爾必欽必慎用副朕意遣定  
國公徐光祚以葬期告天地駙馬都尉游奉告宗廟  
新寧伯譚佑告社稷帝褰服告几筵文武百官及命  
婦晨詣清寧門外哭臨如儀先期結平臺與順天府  
交衢相值十二日帝晨出北安門迎皇太后及皇后  
御平臺候殯復入至清寧宮率番僧梵咒乃發引遂  
親奉梓宮朝祖百官褰服腰經徒步送至德勝門外  
沿途皇親羣臣命婦各祭如儀梓宮至山陵獻殿行  
安神禮遣工部尚書李燧告謝后土并天壽山之神  
駙馬都尉崔元林岳馬誠分告長陵獻陵景陵裕陵

茂陵泰陵十六日合葬于茂陵行初虞禮十七日帝  
奉神主還京行再虞禮十八日三虞四虞十九日五  
虞二十日六虞俱在途二十一日七虞是日神主至  
京百官奉迎于德勝門外神主至几筵帝行安神禮  
遂行八虞二十二日九虞帝素翼善冠素服腰經御  
西角門百官奉慰二十三日帝仍褻服行卒哭禮畢  
始釋服還宮

孝宗母后紀氏爲憲廟妃成化十一年六月二十八  
日薨于永壽宮追封淑妃贈謚恭恪莊僖八月葬于  
西山自初喪至發引下葬帝及皇太后中宮皇妃親

王公主皇子各有祭遣皇子奉祝冊行禮營域葬儀俱從厚皇親百官及命婦送葬設祭俱如常儀至二十三年十二月孝宗既葬皇考于茂陵遂奉以祔葬遣奉遷官祭奠如儀

世宗聖母壽安興國太后加尊章聖慈仁皇太后邵氏嘉靖元年十一月十八日崩二十七日服除部臣毛澄等請上即吉御奉天門視事議再上不許命孝肅太皇太后喪禮行之澄等又言孝肅崩時距葬期不遠故暫爾持凶以待山陵事竣與今不同况當正旦朝元之會亦不宜素冠縞衣臨見萬國若孝思

未忘第每御中門及不鳴鐘鼓足矣帝不得已從之  
仍免朔望日升殿二年二月梓宮發引遣安仁伯王  
桓建平伯高露秦寧伯陳儒護送吏部右侍郎何孟  
春等俱送至山陵遣成國公朱輔武定侯郭勛鎮遠  
侯顧仕隆豐城侯李叟祭告后土并天壽山及諸陵  
奉梓宮葬茂陵畢輔等仍各祭謝如儀越四日帝御  
奉天門百官行奉慰禮是日後始鳴鐘鼓鳴鞭悉從  
古典

孝宗皇后張氏嘉靖二十年八月八日崩十一月六  
日梓宮發引侍御儀仗用存日所御者謚冊寶輿桑



主輿香亭銘旌以次先行靈駕進發初禮部議上親捧桑主行謁廟禮及遣官分行祭告議入帝覽之曰南北郊社稷不宜上瀆朕躬行諸禮前已諭代行桑主舊是魂帛遣奠如舊無辭奠及德勝門外奠虞祭後有卒哭不必改葢以悅懿靈也在內命內侍監官鮑忠主之定國公徐延德護喪尚書李如圭題主太常寺以敬皇后朝祖祔廟預請各廟捧主官詔主俱不出光祿寺請路祭例皆素饌從之九日合葬秦陵十日神主還京

武宗皇后夏氏嘉靖十四年正月二十五日崩帝命

禮部喪禮視聖慈仁壽太皇太后制行及禮部上儀注有上素冠素服經帶舉哀及羣臣奉慰禮帝曰朕於皇兄后無服制矧奉兩宮皇太后在上又迫聖母壽旦忍用純素朕青服視事諸儀再擬于是尚書夏言等言大行莊肅皇后喪禮在臣民無容議惟是皇上以天子之尊服制既絕不必臨御西角門羣臣成服後不當服素朝叅三月禮部上喪葬儀帝復諭孝靜毅皇后事宜與累朝元后體制不同無几筵之奉當即行祔廟令皇后攝事于內殿言等議按禮葬畢行虞禮虞畢卒哭乃行祔告蓋以新主當入舊主當

祧故預以告及大祥後乃祔享焉此在常典則然而  
非今日之義例也毅皇后神主誠宜即祔太廟以妥  
神靈而祔告之禮宜免因具上其儀制可合葬康陵  
世宗皇后陳氏嘉靖七年十月二日崩禮部上喪祭  
禮儀帝疑過隆令更議部臣具累朝舊儀叅酌上請  
帝躬自裁定以示閭臣云聞喪次日百官素服于思  
善門橋南哭臨又次日亦如之第四日成服百官衰  
服入臨如前三日免蓋尊皇太后之意第四日朕視  
朝百官素冠服行奉慰禮二十七日後百官黑冠素  
服角帶朝叅發引後從吉如遇七及百日小祥大祥

俱淺色衣朝叅初叅三日朕不視朝如當朝兩宮服  
淺色衣玉帶蓋盡事親之道第四日成服為始朕冠  
黑翼善冠素服犀帶視朝十二日盡杖期以日易月  
之意前後共二十七日俱西角門視朝服淺色衣二  
十七日後于奉天門視朝俱不鳴鐘鼓如遇朝兩宮  
之日則具常服已復降旨朕當黑冠素服降之九日  
而釋可矣閣臣張璠等奏大行皇后喪禮皇上以兩  
宮皇太后在上不敢以卑加尊是以欲為降殺非故  
蓄恩也臣竊謂夫婦之倫叅三綱而立人君為綱常  
之主言動世為法則尤不可不慎謹按記曰天子之

與后猶父之與母也故為天王服斬衰父之義也為后服齊衰母之義也又按左傳昭公十五年六月乙丑周景王太子壽卒秋八月戊寅王穆后崩叔向曰王一歲而有三年之喪二焉蓋古禮父為子夫為妻皆服報服三年觀此則周天子尚為后服三年之服後世夫為妻始制為齊衰杖期父母在則不杖夫喪服自期以下諸侯絕然特為芻期言若妻之喪本自三年報服殺為期年則固未嘗絕者今古制不可復皇上為后服期以日易月僅十二日臣子為君母服三年以日易月僅二十七日較諸古禮已至殺也殺

而又殺則至于無矣臣謂皇上宜服期十二日容臣  
子素冠服終二十七日不然則恩紀不明典禮有乖  
臣等何忍令後日史臣書曰天子不成后服自皇上  
始乎亦何忍令後日史臣書曰臣子不終君母之服  
自臣等始乎時禮臣方獻夫亦雜引儀禮喪服等篇  
反覆爭辨謂苟期可降正期不可降亦舉周景王為  
后三年之文及三朝聖諭所載仁孝皇后崩太宗裹  
服後仍服數月白衣冠故事以證之帝謂文皇后喪  
時上無聖母下有東宮從重盡禮為宜今不敢不改  
其制已詹事霍韜奏謂禮夫為妻服朞此萬世之經

也因禮之變而酌義之中則有權焉今日官員遭妻之喪無服衰泣事之禮惟三年之喪乃釋位蓋謂三年之喪達乎上下若妻之喪則內而不外陰不可以當陽也在百官則然陛下何獨不然聖諭云素服十日倣輟朝之義臣則曰為皇后服禮也然于內廷行之可也若對臨百官總理萬幾履當陽之位行中宮之服或不可也蓋制服于內可以自盡素服于外特以示變權而得中乃所以為禮也百官為皇后服衰為其母儀天下也禮父在為母杖不上于堂尊父也為衆人言之也至于朝廷何獨不然臣請陛下元冠

素服御西角門十日即元冠元服御奉天門百官入  
左掖門則烏紗帽元衣侍班奏事退出公衙及居私  
室仍素服白帽二十七日而降若曰於禮猶有所未  
慊也則山陵事畢而除帝以韜所奏斟酌時宜當從  
所擬十五日常服在奉天門視朝百官淺色衣朝參  
退仍如制服二十七日而除諭禮部曰皇后陳氏作  
配朕躬已及七年宜有稱謚以昭後世不必會議即  
行翰林院擬謚奏請欽天監擇日朕將躬告祖宗遣  
官持節行禮禮部定儀閏十月三日早上具袞冕服  
以冊謚告于奉先殿崇先殿用牲醴祝文如常儀先



期鴻臚寺官設節案冊案于奉天門東內侍設節冊  
案于几筵前節案居左冊案居右設香案于節冊案  
前至期上常服御奉天門正副使常服百官淺色衣  
黑角帶入班叩首畢正副使入就拜位贊四拜禮序  
班舉節冊案于正中置定正副使行五拜三叩頭禮  
畢序班舉案行正副使後隨鴻臚寺奏禮畢上還宮  
節冊至右順門正副使西北立內侍捧節冊由正門  
入至几筵前置于案內贊贊就位上香宣冊官立宣  
訖復置冊于案內侍持節由正門出至右順門外以  
節授正副使報禮畢正副使持節復命次日禮部奉

勅謄黃頌示天下以國公張崙充正使輔臣張璠為副使時中宮皇后喪禮自文皇后而後纔一再行永樂以前禮儀經火弗存會典所載亦皆簡略斯禮斷自上意遂著為令八年三月梓宮將葬帝親定諸儀類從減損以思善門逼近仁智殿命百官哭臨止一日陵地既遠于列聖則辭祖禮宜罷免午門等中門宜避所尊梓宮命由左王門以出禮科王汝梅等疏諫不允葬天壽山襁兒峪冊謚為悼靈皇后十五年九月禮部言先皇后正位中宮七年懿行純德足以母儀天下其原謚悼靈考之謚法在悼雖協年中早

天之義而靈儀爾六類非美大之稱請下翰林更議  
褒稱帝從其言詔改謚曰孝潔命少傅夏言題主隆  
慶元年三月十七日遷葬永陵

世宗皇后張氏嘉靖十三年正月廢十五年閏十二  
月三日崩十六年正月改曰繼后葬于西山

世宗皇后方氏嘉靖二十六年十一月十八日崩即  
日發喪諭禮部皇后比救朕危奉天濟難其考元后  
喪禮行之禮部奏定其儀二十一日大殮設几筵安  
神帛立銘旌上具喪服東宮以下皆成服行祭禮成  
服日為始上黑冠素服十日後易淺色衣俱西角門

視朝百官十日內俱布帽素服經帶朝叅十日後烏紗帽黑角帶素服通前二十七日後上常服于奉天門視朝百官淺色衣鳴鐘鼓鳴鞭如常朔望日暫免陞殿俟梓宮發引日百官始服常服上于奉先等殿行禮俱常服于几筵祭則服其服服滿日命中官代祭先是欽天監擇小殮二十一日大殮成服二十三日帝曰四日成服禮不可易也仍如禮制行尋又諭皇妃列太子後非禮妃皆諸母况父在上耶其改正行十二月冊諡爲孝烈皇后遣駙馬都尉京山侯崔元告太廟成國公朱希忠充正使持節大學士夏言

充副使捧冊行禮二十七年二月帝以陵名未定諭禮臣考太祖成祖二后先安元宮其陵名薦于何時禮臣考孝慈皇后葬孝陵仁孝皇后葬長陵皆命名在先卜葬在後載兩朝實錄中于是帝定孝烈皇后陵名曰永陵仍御製祝文命公朱希忠告太廟禮部具喪葬儀以請帝覽之曰梓宮由中道行虞祭如禮制用九數往者孝潔皇后崩時仰避慈宮且別有謂令孝烈皇后功德俱踰非私嬖也安元宮當居左他日即配享廟庭旣而部臣復上儀注帝改薦殿曰行享殿五月禮部言曩孝潔皇后自發引至神主還京

將及半載且中遇元旦令節百官宜從常服今孝烈  
皇后初十日發引十五日即還事體不同以諸臣服  
制上請帝曰昔有兩宮在臣從君敬其所尊厥禮是  
矣今日卿等有母事之義隨喪往來者仍當制服祭  
畢回者以烏帽素服入朝素冠素服辦事迎主仍制  
服思善門外行安神禮更素冠素服從事先是帝命  
后禮與孝潔皇后啓安禮併舉孝烈居左旣而以孝  
潔久安不宜妄動且有二妃主依祀亦久詔罷孝潔  
啓安禮至是部臣以元宮規制請得旨更定孝烈仍  
居右而虛其左云

穆宗母后杜氏爲世廟康妃嘉靖三十三年正月十日薨禮部言累朝皇妃薨或未生皇子或子非居長而受封之國或子立爲東宮而先薨俱與今不同惟成化中淑妃紀氏薨所生皇子又倫序居長與今相類但彼時皇子尚幼今裕王已成婚宜持服主喪送葬出城乃議朝五日裕王斬袞三年欽遣大臣題主開塋掩壙祠謝后土并用工部官送葬儀仗人數皆增于舊帝謂非禮之正其酌考賢妃鄭氏例于是尚書歐陽德等復上議注輟朝二日不鳴鐘鼓上服淺淡色衣于奉天門視事百官具淺色衣烏紗帽黑角

帶朝叅命裕王主饋奠之事王率妃入宮素服哭盡  
哀四拜視小殮大殮成服後朝夕哭臨三日後每日  
一奠通前二十七日而止仍于燕居盡斬衰三年之  
制以伸子情冊諡焚黃日陳祭儀裕王詣靈前行禮  
柩出元武門裕王步送至京城門外路祭畢還宮帝  
謂焚黃乃制命非王可行仍如常禮禮部復奏皇妃  
焚黃儀傳訛已久蓋累朝或所生皇子及親王或司  
禮監官行禮皆拜而獻酒跪而讀祝乃叅用上尊諡  
之儀而未思賜諡爲制命其祭文稱皇帝遣諭與上  
尊諡不同也今奉旨以常禮從事當改議賜諡如賜



祭禮讀祝宣冊皆平立不拜報可著爲令遂冊諡爲  
榮淑康妃穆宗即位乃追尊曰孝恪皇后初葬西山  
隆慶元年三月十七日遷葬于永陵

穆宗皇后李氏帝居裕邸后爲元妃先薨葬西山隆  
慶元年清明節加諡爲孝懿皇后先期遣駙馬都尉  
謝詔告奉先殿帝親告世宗几筵是日帝御皇極門  
遣成國公朱希忠持節靈壁侯湯世隆捧冊寶詣陵  
園上之大學士徐階題主六年九月十九日合葬昭  
皇后陳氏祔葬昭陵

神宗母后李氏萬曆四十二年二月九日崩帝諭禮

臣從優具儀十日發喪小殮十一日大殮十二日成服帝袞服行奠祭禮穆廟皇妃中宮皇貴妃皇嬪等皇太子福王并妃瑞王惠王桂王瑞安長公主榮昌公主壽寧公主景恭王妃才人皇長孫諸孫諸孫女皆成服設祭每七及百日皆上祭百官詣慈寧宮門外哭臨一品至四品命婦由西華門入慈寧宮門哭臨餘俱如大喪禮題大行皇太后銘旌頒賜二輔臣及中書官汪民敬等銀幣有差五月勅勲戚重臣一員充奠獻使并護喪又勅武職大臣一員管領官軍護侍梓宮行命大臣一員題主禮部堂上官一員監

禮部護喪內侍官并入皇堂內官內使匠作六月九日梓宮發引十五日祔葬昭陵入金井掩土後行初虞再虞以至八虞俱奠獻使行禮二十二日神主入太陽門奉安几筵帝親行安神禮畢復行九虞二十三行卒哭禮罷朝夕奠四十三年二月小祥輟朝一日不鳴鐘鼓帝服淺淡色衣于文華門視事百官青素服黑角帶朝參辦事

神宗皇后王氏萬曆四十八年四月崩禮部差官計告諸王府南京浙江等十三省布政使司及直隸府分成服日爲始帝素冠服十二日百官布帽素服繼

帶朝叅十二日以後帝易黑翼善冠淺淡色服黑犀帶御文華門視事鳴鐘鼓百官素服烏帽黑帶皂靴朝叅其在衙門辦事仍用素服布裹紗帽垂帶腰纏麻鞋至二十七日而除帝御奉天門視朝常服鳴鞭如常朔望暫免陞殿皇太子諸王二十七日後凡問安視膳詣御前俱易烏紗翼善冠青布袍詣大行皇后几筵前及私居仍素服其告葬辭靈啓奠祖奠虞祭卒哭迎主俱服縗服百官二十七日後朝叅服淺色衣至辦事俱烏紗帽青素服黑角帶皂靴候發引後始服常服南京堂上官進香者服制雖滿仍素服

行禮七月十三日冊諡爲孝端皇后以英國公張惟賢充正使大學士方從哲充副使各持節捧冊行禮遣侯陳良弼祭告南郊吳汝涓祭告北郊駙馬萬燁祭告太廟伯陳緯祭告社稷合葬定陵孝靖皇后王氏祔葬定陵

光宗皇后郭氏爲元妃時先薨泰昌元年追封皇后天啓元年閏三月以改題孝元貞皇后神主賜輔臣等銀幣三年八月壬寅奉梓宮遷祔慶陵同日奉孝和皇太后王氏祔葬慶陵孝純皇太后劉氏亦祔慶陵熹宗皇后張氏崇禎末別葬不得合葬德陵

禮十九

凶禮三

興宗孝康帝后陵寢  
皇妃等喪葬

唐宗獻皇帝后陵寢  
皇太子及妃喪葬

諸王及妃公主喪葬諸儀

興宗孝康帝后陵寢洪武二十五年四月丙子皇太子薨太祖命禮部議喪禮侍郎張智等議曰喪禮父為長子服齊衰期年又云期之喪達乎大夫今酌其宜皇帝當以日易月服齊衰十二日祭畢釋之在內文武百官于公署齋宿翼日素服入臨文華殿給袵服三日成服詣春和門會哭明日素服行奉慰

禮其當祭祀及送葬者仍衰經以行在京停大小祀  
事及樂至復土日而止停嫁娶六十日在外文武官  
聞喪易服于公署發哀次日成服行禮停大小祀事  
哀樂十三日停嫁娶三十日其內外百官行祭禮者  
各備儀物帝曰朝廷府庫百官俸祿皆出于民今祭  
祀品物令光祿寺供具百官惟致哀行禮諡曰懿文  
建文帝即位加尊諡爲興宗孝康皇帝元妃常氏洪武  
十一年十一月薨帝素服輟朝三日中宮素服哀臨  
皇太子服齊衰葬畢易常服還命皇孫服斬衰遇祭  
奠則服之諸王公主服如制諡曰懿敬建文初加尊

諡爲孝康皇后繼妃呂氏建文初尊爲皇太后成祖  
即位後俱仍故封號福王立南京復興宗帝后故號  
陵在鍾山孝陵左

睿宗獻皇帝后陵寢正德十四年六月己卯興王亮  
計聞輟朝三日遣武定侯郭剛祭奠仍命行人王瑄  
掌行喪禮昭聖慈壽皇太后孝惠皇太后及文武衙  
門皆致祭焉諡曰獻王葬安陸州嘉靖元年加尊諡  
號曰睿宗獻皇帝修葺陵寢名曰顯陵三年九月錦  
衣衛革職百戶隨全光祿寺革職錄事錢子勳希旨  
告獻皇帝梓宮宜改葬天壽山事下工部尚書趙璜



等以爲改葬不可者三皇考體魄所安不可輕犯山川靈秀所萃不可輕泄國家根本所在不可輕動昔高皇帝定鼎南京而仁祖之陵遠在鳳陽文皇帝遷都北京而孝陵遠在鍾山皆不敢遷改陛下之視顯陵猶太祖之視仁祖太宗之視孝陵也且顯陵已更黃瓦建樓櫺碑及設神宮監顯陵衛臣請增刻諸儀衛俱如二陵制足以垂久若上啓寶山下鍛金井梓宮搖撼聖靈震驚令數千里外跋涉山川蒙冒霜露非仁人孝子之所忍言者時五官靈臺郎吳昇嘗與事獻陵亦疏稱不可遷下禮官併議乃己六年十月

前御史虞守隨罷官家居乃撰入皇陵正議數千言  
以呈帝斥其希進下御史按問因諭大學士張孚敬  
田逢隨之議恐帝后各處乃朕失孝是亦忠意朕恐  
一有誤其爲孝也不孝也夫古者君去國遷廟立而  
行主者陽也先人之精魂故謂之神主墓者藏先人  
之體魄乃陰也是爲元宮地道尚靜體魄貴安豈宜  
輒舉我皇考葬已八年一旦妄動豈勝震恐若干萬  
年之後奉護慈宮以祔陵室何不善也十一月光祿  
寺廚役生福請迎獻皇帝梓宮葬祖陵旁帝以福妄  
害衆歸依衛拷訊十年八月廚役王福千戶陳昇俱

上疏請迎顯陵梓宮葬天壽山疏并下禮部集廷臣  
會議尚書李時等言前席書等建議之詳與皇上罷  
議之命載明倫大典天下共知今福屠宰賤夫勦狂  
憚之說以感激皇上哀慕之衷而昇因希圖寵榮風  
聞附和致朝廷臣再申前議臣聞立廟而祀以安魂  
也卜地而葬以藏魄也魄有定宅而魂氣則無所不  
之自世廟立而皇考在天之靈陟降昭格者已數年  
于茲矣顯陵固皇考藏魄所也况今園陵殿宇規制  
壯麗視天壽諸陵無異其山又更名純德載之祀典  
與基運翊聖神烈列聖之靈同一規制有不可復易

者但顯陵典禮容有未備自今每歲清明節屆先期遣大臣一員往顯陵齋戒祭告如長陵之儀其正旦孟冬中元冬至萬壽聖節及皇考忌辰仍遣本府官行禮庶可慰追遠之心帝以其事重姑從部議己亥十七年十二月四日章聖皇太后蔣氏崩帝詣慈寧宮舉哀括髮設奠畢歸喪次群臣哭臨如儀禮部言歲除大衍皇太后服制二十七日己滿適遇正旦朝會祭享一切吉儀所當酌議皇上是日早黑翼善冠淺淡袍服烏犀帶御殿受朝䟽入未下帝諭大學士夏書元旦元極殿拜天仍具祭服先期一日宜變服

否禮部更請正旦上拜天受朝筵先十日俱宜青服  
盃春特享宗廟自前三日奏齋始皇上具青服臨下  
同之後遇祭享以此爲例餘日仍依孝貞皇太后喪  
禮例行帝覽奏諭內閣曰部疏未免循故事未見損  
益何如禮三年之喪賢者勿過不肖者不敢不勉若  
拘紙上法度後世人君皆罪人不但景君也朕每志  
于古道力不免然時亦不同今旣曰以日易月無有  
不知非虛文也更不必小惠報父母姑息以事親直  
從實爲之豈可作僞雖山陵未就實異古人未葬百  
事皆輟之時今郊社旣不敢廢封建征伐刑賞諸事

命出一人本無虛日謂之居喪吾不信也便當如制  
定服後皆不必遷就遇郊有事宜吉服作樂况父在  
柩于嗣位率用全吉何事天反云爾此尊尊也廟有  
事服淺色服不作樂此親親也居他處服墨布至喪  
次仍素服候奉引安陵仍用始服之服以終之庶爲  
情實遂定歲除日變服元色吉衣元旦祭服于元極  
寶殿行告祀禮具翼善冠黃袍御殿百官公服致詞  
鳴鐘鼓鳴鞭奏堂上樂又勅諭禮工二部曰皇考顯  
陵在湖廣承天府山川淺薄堂隧狹陋且越阻千里  
寧免後艱令長陵西南得支山曰大峪林茂草鬱

岡阜豐衍別在諸陵之次實爲吉壤茲欲啓迎皇考  
梓宮遷祔于此其擇日興工于是武定侯郭勛未學  
出夏言等言今日舉事有二大端一興大峪之役始  
啓承天之殯惟是奉啓之儀要在嚴辦周悉夫皇考  
始葬主禮也今陛下以天子之貴天下之富終事其  
親宜備尊諡香冊銘旌及諸吉凶儀仗斂衣弁冕之  
屬奉將以往命如擬行駕發京師詣大峪相視陵穴  
帝素服腰經以建造顯陵告長陵遣大臣朱希忠等  
分告六陵尚書嚴嵩祭天壽山侍郎周敘祭大峪等  
神總遣大臣一員祭告皇祖太廟皇考睿廟興工日

駕還京師巡按直隸御史陳讓疏言喪有藏也欲入  
之不得見也今出聖考玉魄于所善藏之地雖重封  
累槩能無疑哉昔黃帝衣冠之陵在陝西延安府中  
部縣名爲橋陵舜葬九疑二妃不從則古人事死之  
禮先廟後墳重魂後魄蓋知鬼神情狀之深者也請  
奉唐宗皇帝遺衣冠與章聖皇太后合葬于大峪山  
又以章聖皇太后遺冠幘合葬于顯陵疏入帝謂其  
乖謬黜爲民帝以送終大事念之至數旬猶未能自  
決初命京山侯崔元尚書張瓚太監鮑忠南迎唐宗  
韓常出親視大峪歸又擬奉慈宮南祔遂停三臣行令



錦衣指揮趙俊齋吉凶儀仗往尋復命俊啓視顯陵  
元宮歸報及元日之夜又命禮部趣昨三命使事原  
定官役南詣承天啓奉嚴宮尚書嚴嵩奏此大事惟  
即聖心所安者行之是即義理之正請暫緩命使待  
趙俊歸報後發庶爲詳慎帝報曰朕意決矣即擇日  
命官恭奉梓宮南柩欽天監擇二月七日梓宮發引  
帝曰八日祈穀奈何于七日發引乃更定十五日已  
而趙俊自承天旋言啓視顯陵元宮有冰于是衆噴  
噴謂顯陵北還帝意欲躬自往視之復諭禮部梓宮  
暫奉慈寧宮俟還京來奏一時諸臣諫南巡者皆復

罪二月十六日駕發京師三月抵承天謁顯陵作再  
謁顯陵歌遂定新元宮四月帝意欲奉皇考純德山而  
葬慈宮大峪徵示其意于行在禮部于是御史謝少  
南請修慶都堯母祠帝曰帝堯父母異陵可知合葬  
非古時大峪元宮已成詔以五月三日發引帝復躬  
視大峪召尚書嚴嵩諭之曰是地空淒不如純德完  
美其用前議乃定合葬禮工部尚書蔣璠奏聖母梓  
宮南附自通州直抵承天水程數千餘里由運河以  
達長江中間湖洪閘壩險阻非一宜命總理河道及  
漕運都御史前期委官疏道汙淺蓄積水利修治閘

壩自儀真至承天府沿江一路宜行南京工部委管  
理蘆洲官會同巡按巡江預爲整理巡船沙船導引  
防送仍備黃船三隻預備倉卒取用從之命京山侯  
崔元充奠獻使靖遠伯王瑾統軍護行錦衣衛都指  
揮使張琦率旂校水次圍宿太監鮑忠提調內使人  
役詹事溫仁和知禮儀事大學士顧鼎臣恭題神主  
成國公朱希忠捧主太常鴻臚光祿錦衣各分官供  
事給事御史各二人監視欽天監官二人安葬禮部  
正魏華禮儀自常典外帝復增定太廟辭謁承天門  
辭奠朝陽門遣奠題主後降神饗神及梓宮登舟升

岍等祭梓宮發引帝乘服行啓奠祖奠奉桑主謁辭  
太廟承天門內辭奠禮如儀梓宮出承天門大明門  
朝陽門百官步送朝陽門外奠獻使行遣奠禮是日  
梓宮至通州題主官復命次日神主回京百官奉迎  
于門外帝乘服率皇后以下哭迎午門內奉安于几  
筵梓宮自張家灣登舟抵承天府所過河瀆江山神  
祇俱牲醴致祭勲臣青服行禮梓宮升席殿先詣睿  
宗舊陵奉遷安于祔恩殿復奉梓宮至祔恩殿閏七  
月庚午二梓宮合葬于顯陵新寢奠獻使執事官還  
京報命

皇妣等喪葬洪武七年九月貴妃孫氏薨無子太祖  
命吳王橚服慈母服斬衰三年以主喪事初皇太子  
諸王皆服期有司營葬厝于朝陽門楮岡之原永樂  
十八年貴妃王氏薨聞喪輟朝五日初喪御祭一壇  
皇后皇妃皇太子各祭一壇親王共祭一壇公主共  
祭一壇七七百日基再基每次祭如初喪制贈諡冊  
文行焚黃禮行內外衙門辦造寘器銘旌等項開塋  
域遣官祠后土發引前期辭靈祭祀壇數與初喪同  
惟增六尚司祭一壇內官內使祭一壇啓奠祖奠遣  
奠各遣祭一壇發引日百官素服送至路祭處所皇親

駙馬共一壇公侯伯文武衙門共一壇外命婦共一壇所過城門祭祀內門遣內官外門遣太常寺官行禮不奠遷奠遣祭一壇掩壙遣官祀后土迎靈輅至享堂行安神禮遣祭一壇天順七年六月敬妃劉氏薨輟朝五日不鳴鐘鼓帝服淺淡色衣于奉天門視事文武百官各具淺淡色衣烏紗帽黑角帶朝參翰林院撰冊文用黃絹裝冊兩葉寫文以祝及冊置靈柩前皇太子以下行三獻禮贊讀祝贊宣冊加封爲惠妃諡曰貞順懿恭葬日早執事者先以方相旛幢靈輦駝馬鼓樂真亭彩亭以次排列于元武門外內

使捧銘旌魂帛導引棺出元武門外喪夫捧棺就輦  
內官以魂帛置于小車中遣官祭喪所經過門百官  
免朝叅烏紗帽黑角帶隨方相後行至德勝門外路祭  
所祭畢還扛喪挽歌執翼及擎執幡幢者香爐紙案  
等俱于都督府撥軍應用靈柩前儀仗內使女樂二  
十四人花旗雪柳女隊子二十人女將軍十一人墳  
所先已開營域遣官祀后土候棺至置于壙前執事  
者整理壙中安頓元纁玉璧匣五穀袋下棺并以銘  
旌魂帛置棺上翼置棺之兩旁下棺掩壙畢迎靈輅  
至享堂行安神禮自初喪至七七百日朞年又朞年

辭靈各于常祭外增祭一壇弘治十四年二月憲廟  
麗妃章氏發引輟朝一日會典載孝陵諸妃俱從葬  
惟二妃葬陵之東西長陵獻陵景陵諸妃俱從葬惟  
獻陵三妃別葬金山景陵一妃別葬金山裕陵以後  
則無從葬者一妃葬綿山諸妃俱葬金山茂陵一妃  
葬茂陵西南諸妃俱葬金山康陵顯陵諸妃俱葬金  
山永陵五妃葬灤兒峪余妃葬金山定陵慶陵諸妃  
葬金山間有別葬者凡陪葬諸妃歲時俱享于殿內  
其別葬諸妃俱遣內官行禮嘉靖間始命併入諸陵  
從祭祔恩殿之兩旁以紅紙牌書曰某皇帝第幾妃



之位祭畢焚之後改木刻名號則永從祀焉嘉靖七年  
三年諭禮工二部法古世婦御妻皆用九歎靈地  
同一墓一享殿遂爲定制

懷獻皇太子及妃喪葬金山悼恭皇太子成化八年  
正月薨年三歲諭禮部喪禮儀從簡天下王府并文  
武衙門俱免進香帛禮部具儀上自發喪日爲始服  
翼善冠素服七日而除~~發~~喪後三日皆不視朝又三  
日上御西角門視朝不鳴鐘鼓祭用素食發引安葬  
皆輟朝文武羣臣間喪素服烏紗帽黑角帶第三  
日素服麻布經帶麻鞋布裹紗帽詣恩善門哭臨一

日而除第四日素服烏紗帽黑角帶朝西角門行奉  
慰禮令內官監工部造銘旌明器墳塋塋誌等類如  
朔以書訃告諸王在外王府并文武衙門聞喪易素  
服于廳事再拜舉哀復再拜次日服素服烏紗帽黑角帶  
經帶設香案舉哀行禮次日服素服烏紗帽黑角帶  
二日而除葬西山哀冲皇太子嘉靖十二年十月薨  
遣冊益葬西山莊敬皇太子嘉靖二十八年三月戊  
子薨禮部上喪禮儀注帝曰天子絕期況十五歲之  
外方出三殤朕服非禮止輟朝十日百官如制成服  
不設詣門哭臨可詣停柩之所行禮他俱如擬葬

西山後憲錄獻懷悼懷太子俱葬金山遣城臣行禮  
萬曆四十七年二月皇太子才人王氏薨命鑾輿太  
子妃郭氏例行輟朝五日不鳴鐘鼓帝服淺淡色衣  
守文華門視事百官各具青素服黑角帶朝參命皇  
長孫主饋奠之事

洪武諸王及妃公主喪葬諸儀二十八年三月秦王  
纘薨計聞詔定喪禮禮部尚書任亨泰奏考宋制宜  
輟朝五日今遇時享暫輟朝一日皇帝及親王王妃  
公主世子郡王郡主及靖江王世子郡君服制皆與  
魯王喪禮同皇太子服齊衰期亦以旧易月十二日

而除素服期年從之定制親王喪聞輟朝三日禮部  
奏遣官掌行喪葬禮翰林院撰祭文諡冊壙誌文工  
部繕銘旌遣官賸饋欽天監官一員上葬國子監生  
八人報訖各王府卿祭一壇皇太后皇太后東宮各一  
壇在京文武官各一壇自初喪至除服御祭凡十三  
壇內文武官祭一壇其服制王妃世子衆子及郡  
王郡主下至宮人斬衰三年封內文武官齊衰三日  
哭臨五日而除在城軍民素服五日郡王衆子郡君  
爲兄及伯叔父齊衰期年郡王妃服小功五月凡親  
屬喪聞御祭一壇皇太后中宮東宮公主各祭一

壇布政司喪官開壙合葬繼妃次妃祭禮同其夫人  
則止御祭一壇俱造壙附葬郡王喪聞輟朝一日行  
人司遣官掌行喪葬禮翰林院撰祭文謚冊壙誌文  
工部造銘旌國子監生報訃各王府初喪御祭一東  
宮祭一京官文武各一自初喪至除服御祭凡十三  
壇布政司委官造壙安葬郡王妃與親王妃同惟無  
公主祭合葬郡主繼妃次妃喪禮俱與正妃同造壙  
附葬凡世子喪禮聞喪御祭一東宮祭一凡遇七及  
首日下葬周年祭凡鎮國將軍止聞喪百日下葬三祭  
減七二周年祭凡鎮國將軍止聞喪百日下葬三祭

奉國將軍以下御祭各一壇洪武九年五月晉王妃  
謝氏薨命禮部翰林院議喪服之制侍讀學士宋濂  
等議曰按唐制皇帝爲王妃等舉哀臨喪素服舉哀  
畢則常服宋制皇帝爲皇親舉哀素紗幘頭白羅衫  
黑銀帶今參酌唐宋之制皇帝及中宮服大功諸妃  
皆服小功南昌皇妃服大功東宮親王公主皆服小  
功晉王服齊衰期靖江王服小功王妃服總麻輟朝  
三日既成服皇帝素服入喪次十五舉音百官奉慰  
皇帝出次釋服服常服制曰可命著爲令正統十三  
年定親王塋地五十畝房序五間郡王塋地三十畝

房兆簡郡王瑩地二十畝房三間郡主縣王瑩地  
十畝房三間天順二年禮部奏准親王以下祿文哉  
大臣例或王或妃先故者合造其墳後葬者止令所  
在官司起夫匠開墳安葬繼妃則附葬其旁同一享  
堂成化八年二月忻王見治薨發引日帝不視朝下  
葬輟朝一日不鳴鐘鼓帝服淺淡色衣于奉天門視  
事弘治十六年七月申王佑楷薨八月禮部議前忻  
穆王薨未出府申王茲已出府而未之國今擬依忻  
穆王儀參以在外親王例定爲儀注成化十三年九  
月四川按察司彭韶言親王郡王薨逝皆遣官致祭

使臣路鐸人夫勞擾自後惟親王如舊其郡王初喪  
遣官一祭餘祭並遣本處官凡王國母妃之喪俱遣  
內官致祭今宗婦衆多有鎮守太監處宜遣行禮又  
生園營葬夫婦同穴遇有喪葬不同先後一體遣造  
其初造之時仍遣官監修選擇如有開塋合葬者乞  
免差官止令本處官司提調及陰陽學擇日事下禮  
部覆奏得旨王妃祭禮如舊遣官餘如議行弘治十  
四年十一月禮部覆奏府部等衙門所言減價直事  
自親王及世子郡王以下薨逝近例俱止賜葬祭不  
給齋糧麻布惟郡王長子卒者有之乃先年一時特



恩未及裁軍請一體革去從之會典載壽春王妃劉氏霍丘王妃翟氏下蔡王安豐王妃趙氏蒙城王妃田氏寶應王六安王來安王都梁王英山王皆明初追封墳在鳳陽府西北二十五里地名白塔設祠祭署陵戶南昌王妃王氏盱眙王妃唐氏臨淮王妃劉氏山陽王招信王皆明初追封附葬鳳陽皇陵有司歲時祭祀皆與享懷獻世子靳獻王滕懷王忻穆王許悼王衛恭王貞烈妃楊氏越靖王貞惠妃吳氏秀懷王妃黃氏岐惠王蔚悼王俱葬于西山歲時遣內官行禮其分封諸王葬于本封之國者其子孫自主

祭祀此不具列

永樂十五年正月永安公主薨計聞帝深悼之時初  
舉張燈宴遂罷之輟朝四日賜祭命有司治喪葬二  
月太祖第八女福清公主薨輟朝三日定制凡公主  
喪間輟朝一日御祭一皇太子中宮東宮各祭一公  
主共祭一翰林院撰祭文壙誌文戶部給齋糧工部  
遣銘旌神主魂帛棺槨墳壙誌石冥器儀仗欽天監  
官選地擇日國子監生報訃自初喪至大祥御祭凡  
年二壇下葬輟朝一日柩由東上南門東上北門北  
中門北安門出王部內監官于墳所設享堂教坊司

擬安樂選宦墳所祀后土并題主安神俱遣大臣行  
禮祭物光祿寺備辦永清公主長奉公主仙遊公主  
俱葬西山歲時遣內官行禮凡公主喪制與親王同  
惟各官不成服